

Cyfarfod Cyffredinol Blynyddol 2024

Dogfen Ganllaw a Gweithdrefn

Cyflwyno Cynnig



Pŵer a Phwrpas

Edrychodd Cam 2 o Adolygiad Democratiaeth yr Undeb ar broses llunio polisi Undeb y Myfyrwyr, gan gynnwys y ffordd y caiff polisi ei greu gan Gyfarfod Cyffredinol Blynyddol yr Undeb. Yn dilyn hyn, cymeradwyodd Senedd y Myfyrwyr a Bwrdd yr Ymddiriedolwyr gyfres o argymhellion, a oedd yn cynnwys creu dogfen ganllaw yn egluro sut a beth y gall myfyrwyr ei gyflwyno i'w drafod yn y CCB.

Bydd y ddogfen ganllaw hon yn rhoi mwy o eglurder i fyfyrwyr a chynigwyr am yr hyn a ganiateir o fewn pwerau'r CCB a'r hyn y gellir ei wneud ar ôl i fyfyrwyr gymeradwyo cynnig. Nod y broses hon yw gwella tryloywder yr Undeb yn gyffredinol, a sicrhau nad yw myfyrwyr bellach yn pleidleisio nac yn trafod cynigion na fydd o bosibl yn cael eu deddfu gan yr Undeb am amrywiaeth o resymau – gan gynnwys y gyfraith.

Mae Cyfarfod Cyffredinol Blynyddol (CCB) Undeb Myfyrwyr Caerdydd yn gorff gwneud penderfyniadau ffurfiol o fewn yr Undeb, a bennir gan ddogfennau llywodraethu'r Undeb gan gynnwys 'Memorandwm ac Erthyglau Cymdeithasu' ac 'Is-ddeddfau' yr Undeb. Mae'r dogfennau hyn yn nodi pwerau'r CCB a'r ffordd y mae'n ofynnol i'r Undeb wneud penderfyniadau.

Mae CCB yr Undeb yn cyflawni rhai o ddyletswyddau undebau myfyrwyr, fel y diffinnir yn Neddf Addysg 1994 ac a oruchwylir gan y Brifysgol. Mae hyn yn golygu weithiau mae'n ofynnol i'r Undeb wneud penderfyniadau ynghylch CCB, yr eitemau a drafodir, a'r ffordd y gwneir penderfyniadau i gydymffurfio â gofynion yn hytrach nag mewn ffordd sy'n caniatáu'r drafodaeth fwyaf. At hynny, fel elusen gofrestrdig mae'n hanfodol bod y camau a gymerir gan yr Undeb yn cyd-fynd â'n diben a'n hamcanion elusennol. Fel yr amlinellir ym Memorandwm ac Erthyglau Cymdeithasu'r Undeb:

“Amcanion yr Undeb yw hyrwyddo addysg Myfyrwyr ym Mhrifysgol Caerdydd er budd y cyhoedd drwy:”

- 4.1. hyrwyddo buddiannau a lles Myfyrwyr Prifysgol Caerdydd yn ystod eu cwrs astudio a chynrychioli, cefnogi, a chynghori Myfyrwyr;*
- 4.2. bod yn sianel gynrychioliadol gydnabyddedig rhwng Myfyrwyr a Phrifysgol Caerdydd ac unrhyw gyrff allanol eraill; a*
- 4.3. darparu gweithgareddau cymdeithasol, diwylliannol, chwaraeon, a hamdden, a fforymau ar gyfer trafodaethau a dadlau ar gyfer datblygiad personol ei Fyfyrwyr.”*



Mae'r ddogfen ganllaw a gweithdrefn hon yn ddogfen swyddogol, sy'n amlinellu'r broses o gyflwyno cynigion ar gyfer Cyfarfod Cyffredinol Blynyddol yr Undeb 2024 ac felly mae'n estyniad ffurfiol o'r Hysbysiad o CCB. Rhaid i unrhyw gynig a gyflwynir fod yn unol â'r gofynion a nodir yn y ddogfen hon, ac ni fydd unrhyw gynig sy'n methu â bodloni'r gofynion a nodir yn y ddogfen hon yn cael ei ystyried.

Amserlen ar gyfer Cyflwyno Cynnig

Dydd Mercher 23^{ain} Hydref: Bydd y **porth cyflwyno cynnig yn agor** a gall aelodau gyflwyno cynigion ar gyfer CCB eleni.

Dydd Llun 4^{ydd} Tachwedd, 10yb: Bydd y **porth cyflwyno cynnig yn cau**.

Rhwng dydd Llun 4^{ydd} Tachwedd a dydd Gwener 8^{fed} Tachwedd : Bydd tîm CCB Undeb y Myfyrwyr **yn adolygu'r cynigion a gyflwynwyd** ac yn hysbysu cynigwyr o benderfyniadau ynghylch a all eu cynigion symud ymlaen at y cam nesaf ai peidio. Lle nad yw'r newidiadau gofynnol yn sylweddol, gall y tîm CCB gynig cyfle i gynigydd ddiwygio eu cynnig er mwyn caniatáu iddo gael ei ystyried. Efallai y bydd y tîm CCB hefyd yn awgrymu bod cynigydd yn ceisio ymgysylltu a siarad â myfyrwyr ynghylch eu cynnig er mwyn sicrhau bod y rhai y mae cynnig o'r fath yn effeithio arnynt wedi'u hystyried.

Lle mae cynigydd wedi cael eu hannog neu wedi cael cynnig cyfle i wneud newidiadau, rhaid i'r cynigydd gyflwyno eu cynnig wedi'i ddiweddarau dros e-bost i aqm@caerdydd.ac.uk erbyn 4yh ddydd lau 7^{fed} Tachwedd fan bellaf. Bydd y tîm CCB wedyn yn cyfleu unrhyw benderfyniadau terfynol ynghylch symud cynnig i'r bleidlais flaenoriaeth erbyn canol dydd, dydd Gwener 10^{fed} Tachwedd. Lle bo cynigydd yn dymuno herio penderfyniad a wnaed gan y tîm CCB, dylent ddilyn y broses a amlinellir yn adran 'Herio Penderfyniad' y ddogfen hon.

Dydd Mawrth 12^{fed} Tachwedd, 10yb: Bydd y **bleidlais flaenoriaeth yn agor** a gall aelodau bleidleisio dros y 4 cynnig y maent yn dymuno eu trafod yn y CCB eleni.

Dydd lau 14^{eg} Tachwedd, 4yh: Bydd y **bleidlais flaenoriaeth yn cau**.

Dydd Gwener 15^{fed} Tachwedd: Cyhoeddi agenda terfynol y CCB.

Dydd lau 21^{ain} Tachwedd: Cyfarfod Cyffredinol Blynyddol 2024, Y Neuadd Fawr



(Undeb Myfyrwyr Caerdydd), 6-9yh.

Fformat Cynigion

Dylid fformatio cynigion a gyflwynir yn y fformat cynnig CCB safonol. Mae'r fformat hwn yn canolbwyntio ar dair adran – Nodiadau CCB, Cred y CCB, Penderfyna'r CCB. Mae pob adran yn chwarae rhan bwysig wrth amlinellu cynnig a hysbysu myfyrwyr am y camau a fyddai'n cael eu cymryd gan swyddogion etholedig yr Undeb pe bai'n cael ei basio. Isod gallwch weld mwy o wybodaeth am bob adran.

Nodiadau CCB

Mae'r adran hon, ar ddechrau cynnig, yn nodi'r sefyllfa fel y mae ar hyn o bryd. Mae angen ei hysgrifennu mewn ffordd glir a chryno, gan ddarparu gwybodaeth gyd-destunol berthnasol y credwch y dylai myfyrwyr ei gwybod cyn ystyried y cynnig neu'r camau gweithredu arfaethedig.

Cred y CCB

Dylai'r adran hon ddatblygu ymhellach ar yr adran nodiadau a darparu'r egwyddorion sy'n esbonio pam mae cynnig o'r fath yn bwysig i fyfyrwyr, a pham y dylai newid ddigwydd.

Penderfyna'r CCB

Dylai'r adran hon nodi'r union gamau y byddai'n ofynnol i swyddogion Undeb y Myfyrwyr eu cymryd pe bai'r cynnig yn cael ei basio. Dylai restru'r holl ganlyniadau a chamau gweithredu disgwylidig.

Mae'r porth cyflwyno cynigion wedi'i fformatio yn y ffordd uchod felly nid oes angen i aelodau gymryd unrhyw gamau pellach i sicrhau bod eu cynnig yn cael ei gyflwyno'n gywir.

Os oes angen cymorth ar unrhyw aelod i fformatio cynnig neu os ydynt angen cyngor, fe'i hanogir i siarad ag aelod o dîm Llais y Myfyrwyr drwy anfon e-bost at agm@caerdydd.ac.uk.

Gofynion Cynigion

Wrth gyflwyno cynnig, rhaid i gynigydd sicrhau bod y cynnig yn unol â'r gofynion a nodir isod. Wrth ystyried cynnig, y gofynion a nodir isod bydd yn cael eu defnyddio gan y tîm



The heart of Cardiff student life
Calon bywyd myfyrwyr Caerdydd

CCB i'w adolygu. Lle nad yw cynnig yn bodloni'r holl ofynion isod yna bydd naill ai'n cael ei wrthod, neu le nad yw'r newidiadau gofynnol yn sylweddol, bydd y cynigydd yn cael cyfle i wneud golygiadau i'w cynnig.

Rhaid i unrhyw gynig a gyflwynir i CCB yr Undeb gydymffurfio â'r canlynol er mwyn cael ei ystyried:

- Rhaid i gynigion fod yn berthnasol i fyfyrwyr fel myfyrwyr a gellir dangos yn glir sut mae'r mater yn berthnasol i fyfyrwyr Prifysgol Caerdydd. Mae hyn yn golygu bod yn rhaid i'r camau y mae unrhyw gynig yn galw amdanynt fod yn benodol i amgylchedd y Brifysgol a myfyrwyr fel myfyrwyr.
- Ni all cynigion bennu safbwyntiau corfforaethol y sefydliad ar faterion. Mae hyn yn golygu na all cynigion alw ar Undeb Myfyrwyr Caerdydd i wneud datganiad yn amlinellu safbwynt fel sefydliad (h.y. datganiad sy'n datgan 'cred Undeb Myfyrwyr Caerdydd').
- Rhaid i gynigion fod o fewn y gyfraith, a pheidio â galw am nac annog unrhyw ymddygiad a allai gael ei ystyried yn anghyfreithlon.
- Ni all cynigion alw am gyfyngu ar hawliau unrhyw aelod arall fel aelod o Undeb Myfyrwyr Caerdydd.
- Ni all cynigion alw am unrhyw gamau gweithredu sy'n cyfyngu ar, neu'n lleihau, hawl myfyrwyr i ryddid barn.
- Rhaid i deitlau cynigion fod yn adlewyrchiad cywir o benderfyniadau'r cynnig.
- Rhaid i gynigion beidio â gwneud neu benderfynu gwneud penderfyniadau masnachol ar ran yr Undeb nac amlinellu gweithgaredd masnachol arfaethedig. Mae hyn yn cynnwys cyflwyno a chyfyngu ar weithgarwch masnachol.
- Ni all cynigion wneud penderfyniadau ariannol ar ran yr Undeb, gan gynnwys manylu ar gamau gweithredu sy'n gofyn am ymrwymiad ariannol gan yr Undeb.
- Rhaid i gynigion beidio â gwrth-ddweud neu wrthdaro â dogfennau llywodraethu'r Undeb, na cheisio defnyddio pwerau a gadwyd yn ôl ar gyfer corff, pwyllgor neu grŵp arall o fewn Undeb y Myfyrwyr.



Mae Undeb y Myfyrwyr yn cadw'r hawl i wrthod neu atal cynnig os yw'r Undeb yn credu y gallai dadl ar gynnig o'r fath roi myfyrwyr mewn perygl, arwain at ymddygiad anghyfreithlon, neu achosi'r Cyfarfod Cyffredinol Blynyddol i fod yn anniogel neu fethu â chynnal ei fusnes hanfodol.

Herio Penderfyniad

Os nad yw cynigydd yn cytuno â phenderfyniad y tîm CCB i wrthod cynnig neu fynnu bod cynnig yn cael ei olygu, yna gall y cynigydd herio'r penderfyniad.

Rhaid i'r cynigydd herio drwy e-bostio at agm@caerdydd.ac.uk o fewn 24 awr, wedi i'r tîm CCB anfon y penderfyniad atynt. Dylai'r e-bost nodi'n glir eu bod yn herio'r penderfyniad ac amlinellu pam eu bod yn credu bod eu cynnig yn unol â'r gofynion a nodir yn y ddogfen hon.

Bydd y cais am adolygiad wedyn yn cael ei anfon at Swyddog Adolygu annibynnol y CCB ochr yn ochr â phenderfyniad gwreiddiol y tîm CCB. Bydd Swyddog Adolygu'r CCB wedyn yn ystyried y cais ac yn ei adolygu yn erbyn y gofynion a nodir yn y ddogfen hon, yn ogystal â dogfennau llywodraethu'r Undeb.

Ni fydd Swyddog Adolygu'r CCB yn ystyried eu penderfyniad yn erbyn penderfyniadau blaenorol, na'r hyn a drafodwyd mewn unrhyw CCB blaenorol yn yr Undeb cyn creu'r ddogfen hon, na gweithredoedd neu benderfyniadau sefydliadau a/neu undebau myfyrwyr eraill.

Bydd penderfyniad y Swyddog Adolygu CCB yn cael ei gyfleu i'r cynigydd cyn gynted â phosibl. Bydd eu penderfyniad yn derfynol ac ni ellir ei herio ymhellach.

Nid yw penderfyniadau a wneir gan Fwrdd Ymddiriedolwyr yr Undeb yn destun y broses herio hon.

Pleidlais Blaenoriaeth

O 10yb ddydd Mawrth 12^{fed} Tachwedd 2024 tan 4yh ddydd Iau 14^{eg} Tachwedd 2024, bydd aelodau Undeb Myfyrwyr Caerdydd yn gallu pleidleisio dros y cynigion y maent am eu gweld yn cael eu trafod yn y CCB eleni. Gall cynigwyr ymgyrchu ac apelio ar fyfyrwyr i bleidleisio dros eu cynnig ond rhaid iddynt sicrhau bod eu gweithredoedd yn parhau'n gyfreithlon ac o fewn rheoliadau'r Undeb a'r Brifysgol.

Bydd y 4 cynnig gyda'r nifer fwyaf o bleidleisiau ar ddiwedd y cyfnod pleidleisio yn cael eu



hychwanegu at agenda'r cyfarfod a byddant yn ymddangos ar yr agenda yn y drefn y cawsant eu pleidleisio. Bydd unrhyw gynneg nad sy'n cyrraedd y 4 uchaf ond sy'n derbyn mwy na 25 o bleidleisiau yn cael ei ychwanegu at agenda Senedd y Myfyrwyr yn y dyfodol yn amodol ar gytundeb gan gynigydd y cynneg.



The heart of Cardiff student life
Calon bywyd myfyrwyr Caerdydd